



## GUERZ

*Var sujet eun Den Yaouanc a voa deut da baea  
pêvar sqoët goude e varo.*



**S**PERET-SANTEL, m'o ped, anflamit va speret,  
Da gana eur c'hantic evit ar Vretonet,  
Var sujet eun exempl trist pehini zo êruet  
Ebars en Breiz-Izel, e mis Du tremenet.

Crena ra va c'halon ive va oll memprou,  
Va daoulagad ne reont nemet scüilla daelou,  
O tont da gonsideri peguer trist ê ar matier :  
Goulen a ràn sicour eus ar Verc'hez santel.

Eun den yaouanc, sivoas, voan'em abandonet,  
Goude ma voe maro e dud gant ar c'hlénved,  
A voan'em abandonet da bep seurt tristidiguez,  
Da bep tristidiguez, da bep seurt paourentez.

Evel ma voa yaouanc, ne grede clasq netra :  
Tud vad, dre charite, a gass tamou dezâ ;  
Hac evel ma voa yaouanc e teujot d'er scandalat  
Pa na gare sevel ha mont da labourat.

Souffr a ra mil injur gant güir baciântet,  
O laqat e fizianç er Verc'hez beniguet,  
Dre m'en devoa e imach hac hini ar Bassion,  
Ha ma rê diraze bemdez e orêson.



Un den eus ar c'hontre, un den eus ar c'hartier  
A deuas d'e velet, o clêvet e vizer,  
En eur larat deàn : deus d'am zi da labourat ;  
Ar c'hèz a respontas : ne meus qet a zillad.

Gouzout a ràn certen labourat an douar ;  
Mes allas ! eme'r paour, ne meus na pal na mar :  
Pêvar scoët a vancfe din evit en em eqipa ;  
Me a yêlo d'ho ti sur evit ho paea.

An ozac'h var ar guer a ro ar pêvar scoët,  
O lavarar deàn : Va mignon, ne vanq qet,  
En eur lavarar deàn : deus d'am zi da labourat  
Pa po bet pal ha mar ha prenet da zillat.

Monet a ra d'e di, ma voe eur pennad mad ;  
Plijout a rê deze certen da labourat ;  
Un devez dreist ar re all e voet meurbet estonet  
O sônjal er paour-qèz pelec'h e voa chomet.  
Ma ejont ta da velet, hac e voe cavet maro  
Ebars en e lochic, var eun dornad colo.

Lienet voe e gorf vit bea entêret ;  
Ar brud a zavas prest, ma teujot d'e velet.  
An den-mâ' deuas ive evel m'oa eus ar c'hanton,  
A deuas d'e velet... O Doue pez eston !

Pa zorti eus an ti, d'an oll e lavare :  
Orato birviqen e ene ne antre  
En Barados un Doue, qen en devezo paeet  
Ar pez a rois deàn n'eus qet pell pêvar scoët.



Dre ar c'homzou terrupl pere a brononças,  
N'oun penos an douar d'e lònqa ne zigoras,  
Oc'h arrêti eun ene a voa e vont d'ar joayou,  
A vije recevet gant Jesus en eêvou.

Ar Verc'hez beniguet, dre ma voa dêi fidel,  
A accord eur mennad evit he zervicher,  
Ma teuje var an douar eun instant da labourat,  
Evit monet d'an ti da baea ar barbar.

Monet a ra d'e di, ha ma voe recevet  
Goulen a ra labour, ma voe deàn roet;  
Labourat a ra er parq qement hac an tri güella,  
Ar pez zo estonus, hep dêbri nac eva.

Pa zeu coulz ar repos, caër e vije'r pedi  
Evit monet gante assambles da zêbri,  
En em denne a goste, hac eno var e c'hinou  
En em string d'an daoulin evit souffr e boaniou.

Dont a ra'n uzuiller, qemer a ra eston,  
Hac én monet ractal da laret d'ar Person  
En devoa eul labourer hac a rê qement ha tri,  
Ar pez zo estonus, hep eva na dêbri.

Mâ, eme ar Person, cuntunuit bepret;  
Bremâ zouden vatant me yêlo d'e velet.  
Mes pa êruas er parq, dre bermission Doue,  
Ec'h anaveas pront penos voa eun ene.

Mecônjur, eme'r Person, lavar din me a ped,  
Nê get hirio eiz de em boa da entêret?  
Petra a zefot dide? Petra a glasques amâ?  
Petra a zefot did evit da zelvra?



Pêvar scoët am boabet digant mestr anti-mâ,  
On deut dre vouir voyen sur evit o faea :  
Oh! e leac'h pêvar scoët, eiz certen a vo roet,  
Eur veach, ene paour, qen a vi delivret.

Ne meus qet ar pouvoar da antren er joayou,  
Nemet gant va Æl-mat e clêfen ar c'hêlou ;  
Pedit Doue evidon, me a ya prest d'an êvou :  
Varc'hoas d'armemes heur merento ar c'hêlou.

Dont a ra ar Person da zigass an arc'hant,  
Ma vije delivret a boan hac a dourmant.  
Mes me, eme an ene, am boaint bet digantàn :  
P'oc'h eus ar vadelez, me o rento deàn.

Pa astennas e zorn da guemer an arc'hant,  
E santas an ardor, ar boan hac an tourmant ;  
Evrec'h deo betec e scoa en istant a voe dêvet,  
An arc'hant eus e zorn d'an douar zo qüeet.  
Adieu, autrou Person me ya bremâ d'ar joayou,  
Me bedo evidoc'h Jesus-Christ, hon Autrou.

Pa dleo un den dêc'h, payêl eus ar bed-mâ,  
Elec'h dezirout drouc, pedit Doue gantâ :  
Pedomp bepret hameulomp ma zayo da repos  
Ha da veuli Doue en gloar ar Barados.

FIN.





GUERZ AR GARNEL.

DEMP d'ar Garnel, Christenien, güelomp ar Religou  
DEUS hor breudeur, c'hoarezet hon tadou ha mamou,  
Demeus hon amezeyen, hor brassa mignonet,  
Güelomp ar stat truezus e pini int rentet.

Güelet e reot aneze torret ha bruzunet,  
Ha memes an darnvuia azo e poultr rentet :  
Ne veler mui o noblanç, o danvez, o guenet,  
Ar maro hac an douar o destrujet.

Ar paour hac ar pinvidic, ar mestr hac ar sujet,  
Oll e zint rentet hénvel, oll dizenvelebet ;  
Ne zeus mui nemet esqern, poultr ha breinadurez,  
Dign eus a gompassion hac eus a bep truez.

Hoguen er stat truezus e pini int rentet,  
E parlantont e langach mud elocant meurbet  
Ouz peb-unan ac'hanomp, mar qeromp profita  
Qeit ma plijo gant Doue hon lezel er bed-mâ.

Clêvit eta anezo, ha grit attantion,  
En dezir da brofita eus a greiz ho calon :  
Lavarat a rin deoc'h e zint bet er bed-mâ,  
Hac e varvfot evelto pa sônjot nebeuta.



Ni zo bet var an douar orën qer coulz ha c'houi  
O parlant hac o vale, oc'h eva, o têtcri,  
Ha cetu amâ bremâ ar stat ma zomp rentet,  
Goude m'omp bet en douar o vezur ar préved.

M'oa un den crén ha galant, ha me un dijentil,  
Me voa un den pinvidic, ha me un den habil;  
Me meus collet va noblanç ha me va oll danvez,  
Me va nerz ha va guenet, ha me va güizieguez.

N'hon eus cavet er bed-mâ nemet hon œuvrou mad  
Da bresanti d'or Barner, d'hon Roue ha d'hon Tad;  
List eta madou'n douar, detestit ar viçou,  
Hac ornit mad hoc'h ene a bep seurt vertuziou.

Margoulennit diganemppelec'h êt hon eneou,  
Niresponto: d'ar purgator, rac hounes ê hor brô;  
E maint en tân o têtcri vit peur-baea o dle  
Contractet var an douar da justiç un Doue.

Eus a ouelet ar flammou ne cessont o crial,  
O c'houlén hor pedennou, ma ellint sortial  
Eus ar prisoniou teval e pere int tolet;  
Hastit, hastit d'hor zicour, ha na zaleit qet.

Dêc'h-hu en em adressomp, qerent a mignönet,  
Dagaout memor ac'hanomp pazit dre ar vêtret.  
Lavarit en eur dremen: Doue ra bardono  
D'an anaon er purgator, rac ennes ê hor brô.

Un aluzen, ur beden grêt gant devotion:  
Ur yun pe un oferen, pe ur gommunion,  
A ell calz hor soulaji ha berrât hor poanniou,  
Hac hon tenn en un istant a ouelet ar flammou.



C'houi, Bêleyen charitabl en eus hor c'hunduet,  
En hent hor zilvidiguez, pa edomp var ar bed,  
Cuntinuit c'hoas un nebeut da gaout truez ouzomp,  
Oc'h ober, dre drugare, œuvrou mad evidomp.

Ispicial ho pedomp pa deuit da celebri  
An Oferen en ilis, clêvit neuze hor c'hri  
Eus a ouelet ar flammou o c'houlen diganeoc'h  
Ma teuot d'ober gant Doue dre'r Sacrific hor peoc'h.

Ha p'or bezo peur-baeet ar boan dleet d'hor pec'het,  
Ni hor bezo dêc'h neuze digant Doue reget.  
Pedit, ni a rai ive; en em sicouromp oll,  
Ennes vezo ar voyen ne deuyo den da goll.

Evel an dour o vouga an tân-goall alumet,  
An tân eus ar Purgator a vez ive mouguet  
Dre ar Sacrific santel offret var an Auter,  
Da c'houlen hon delivranç ouz Doue hor Zalver.

Pa zorti an eol squeudus a zindan ar gouabren,  
Ar bed oll en un istant a receo sclêrijen :  
Ni a zortio ive sclêr evel ar stered  
Eus ar poaniou a zouffromp dre'r Sacrific offret.

Adieu, tadou ha mamou, breudeur ha c'hoarezed;  
Adieu, qerent, mignonet; adieu dêc'h, tud ar bed :  
Ni a ra bremâ dêc'h hor c'himiad diveza;  
Adieu dêc'h : qen a vo en traouyen Josapha.

Roit ar repos eternal, va Jesus, va Autrou,  
D'an oll eneou fidel pere zo er flammou,  
Ebars en ho Parados, da veuli da james  
Assambles gant an oll Zent ha gant an oll Æles.



Piou ac'hanomp, va Doue! n'en deveus divoeret  
Un tad, ur vam, ur buguel, qerent all, mignonet?  
Bisitomp-ta o beziou ha pedomp a galon :  
Un douçder an tenerra eo d'ur c'hristen güirion.

Daoulinet var obeziou, e credomp fermamant  
En ur bedi evito, int d'hor speret present.  
Lavaromp-ta evito, gant hor Mam, an Ilis,  
Ur *Miserere mei* hac un *De profundis*.

DOUE RA BARDONO D'AN ANAON!



---

E Montroulez, eus a Imprimeri A. LÉDAN.